

ს დ ა ს უ

შპს საქართველოს დავით აღმაშენებლის სახელობის უნივერსიტეტი



დებულება

სამეცნიერო ნაშრომში პლაგიატის გამოვლენის შესახებ

1. ზოგადი დებულებები

1.1 წინამდებარე დებულება განსაზღვრავს დისერტაციისა და სხვა სამეცნიერო-კვლევითი ნაშრომების შემოწმების წესს პლაგიატის არსებობაზე.

1.2 დებულების ამოქმედება მიზნად ისახავს საგანმანათლებლო და სამეცნიერო საქმიანობის ხარისხის ამაღლებას სამეცნიერო-კვლევითი ნაშრომების შესრულების დამოუკიდებლობის მაღალი ხარისხის უზრუნველყოფით, ინტელექტუალური საკუთრების უფლებების დაცვის ხელშეწყობით, ახალი ცოდნის გენერირებითა და გამოყენებით.

1.3 დებულების მოთხოვნები ვრცელდება სადოქტორო დისერტაციებზე/სამაგისტრო ნაშრომებზე/ სდასუ-ში შესრულებულ სამეცნიერო-კვლევით პროექტებზე/ნაშრომებზე.

2. ტერმინები და განსაზღვრებები

წინამდებარე დებულებაში გამოყენებულია შემდეგი ტერმინები და განსაზღვრებები:

პლაგიატი - სხვათა იდეების ან გამოგონებების წინასწარგანზრახვით მითვისება, საკუთარი სახელით სხვისი ნაწარმოების ან მისი ფრაგმენტების გამოქვეყნება შესაბამისი წყაროს მითითების გარეშე. პლაგიატი ორი სახით ხორციელდება - სხვისი ტექსტის სიტყვასიტყვით გადმოტანით ან პერიფრაზით, ანუ სხვისი ტექსტის საკუთარი სიტყვებით გადმოცემით შინაარსის შეუცვლელად.

დასესხება - საკუთარ ტექსტში სხვა ავტორის ორიგინალური ტექსტის ნაწილების სახეუცვლელად გადმოტანა.

კორექტული ციტირება - სხვისი ტექსტიდან ამონარიდის ჩართვა ავტორისა და ნაშრომის დასახელების მითითებით, ციტირებისთვის გამართლებული მოცულობით.

არაკორექტული ციტირება - სხვისი ტექსტიდან ამონარიდის ჩართვა ავტორისა და ნაშრომის დასახელების მიუთითებლად და/ან ციტირებისთვის გაუმართლებელი მოცულობით.

ტექსტის ორიგინალობა - უნიკალური ელემენტების (სიტყვების, ფრაზების) რაოდენობის თანაფარდობა ტექსტის ყველა ელემენტთან

ანტიპლაგიატი - დოკუმენტების შემოწმების საინფორმაციო სისტემა უკვე გამოქვეყნებული წყაროების არამართებულად დასესხებაზე

3. შემოწმების ზოგადი წესები

3.1 სდასუ-ში პლაგიატზე სავალდებულო შემოწმებას ექვემდებარება სამეცნიერო ნაშრომების შემდეგი სახეობები: წინასწარი ექსპერტიზისთვის წარდგენილი სადოქტორო დისერტაციები/ სამაგისტრო ნაშრომები/სდასუ-ში შესრულებული სამეცნიერო-კვლევითი პროექტები/ნაშრომები.

3.2 ნაშრომის შემოწმება ხორციელდება მას შემდეგ, რაც ავტორი წარმოადგენს ნაშრომს და განაცხადს იმის შესახებ, რომ წარმოდგენილი ნაშრომი არ შეიცავს პლაგიატის

ელემენტებს, ორიგინალურია, სხვა ავტორთა მოსაზრებები მითითებულია დადგენილი წესით, კვლევის მეთოდების გამოყენებისას დაცულია ეთიკის ნორმები.

3.3 ერთი და იგივე ნაშრომის შემოწმება პლაგიატის არსებობაზე ტარდება არაუმეტეს ორჯერ.

3.4 სადოქტორო დისერტაციების/სამაგისტრო ნაშრომების/სდასუ-ში შესრულებული სამეცნიერო-კვლევითი პროექტების/ნაშრომების შემოწმება ხორციელდება ანტიპლაგიატის სისტემის (შემდგომში ანტიპლაგიატი) გამოყენებით.

3.5 წარდგენილი ნაშრომის ანტიპლაგიატით შემოწმებისთვის დადგენილია შემდეგი ვადები:

3.5.1 სდასუ-ში შესრულებულ სამეცნიერო-კვლევით პროექტებზე/ნაშრომებზე - არაუმეტეს 10 სამუშაო დღისა;

3.5.2 დისერტაციებისა და სამაგისტრო ნაშრომებისათვის - არაუმეტეს 30 სამუშაო დღისა;

3.6 ანტიპლაგიატით შემოწმებისთვის ნაშრომები ბარდება ელექტრონული სახით doc, docx ფორმატით, რის შესახებაც გაიცემა ცნობა ჩაბარების თარიღის მითითებით.

3.7 ნაშრომი ორიგინალურად მიიჩნევა, თუ ის აკმაყოფილებს შემდეგ კრიტერიუმებს:

3.7.1 სდასუ-ში შესრულებულ სამეცნიერო-კვლევითი პროექტები/ნაშრომები უნდა შეიცავდეს არანაკლებ 70% ორიგინალურ ტექსტს;

3.7.2 სამეცნიერო კონფერენციის მასალებში გამოსაქვეყნებლად წარდგენილი ნაშრომი უნდა აკმაყოფილებდეს კონფერენციის ორგანიზატორების მიერ დადგენილ პირობებს, მაგრამ უნდა შეიცავდეს არანაკლებ 60% ორიგინალურ ტექსტს;

3.7.3 დისერტაციასა და სამაგისტრო ნაშრომისათვის ორიგინალური ტექსტის მოცულობა უნდა იყოს არანაკლებ 75%-სა.

3.8 თუ დასესხების პროცენტი (წილი) სამეცნიერო ნაშრომში აჭარბებს დებულებით დადგენილს, მიიღება უარყოფითი გადაწყვეტილება მისი დაცვაზე დაშვების/გამოქვეყნების თაობაზე და ჩრდილი ადგება ავტორის რეპუტაციას.

3.9 ნაშრომი, რომელმაც გაიარა შემოწმება ანტიპლაგიატის სისტემით და მიიღო უარყოფითი შეფასება (ანუ არ იქნა მიჩნეული ორიგინალურად), შეიძლება ხელახლა გადამუშავდეს ავტორის მიერ არაუმეტეს ერთი თვის ვადაში.

3.10 თუ განმეორებითი შემოწმებისას შეფასება კვლავ უარყოფითია, ნაშრომი დაცვაზე/გამოსაქვეყნებლად არ დაიშვება.

3.11 თუ ავტორი არ ეთანხმება ანტიპლაგიატის სისტემით მიღებულ უარყოფით შეფასებას, შესაბამისი სკოლის საბჭო/სადისერტაციო საბჭო გამოყოფს კომისიას ნაშრომის ექსპერტული შემოწმებისთვის პლაგიატის არსებობაზე. საბოლოო გადაწყვეტილება ნაშრომის დაცვაზე დაშვების/გამოქვეყნების თაობაზე მიიღება სკოლის საბჭოს/სადისერტაციო საბჭოს სხდომაზე ექსპერტთა დასკვნის საფუძველზე.

3.12 ანტიპლაგიატით შემოწმების ოქმი, ასევე ექსპერტთა დასკვნები (საექსპერტო შემოწმების შემთხვევაში), სამეცნიერო ხელმძღვანელის დასკვნა ინახება სადოქტორო

დისერტაციასთან/სამაგისტრო ნაშრომთან/სდასუ-ში შესრულებული სამეცნიერო-კვლევით პროექტთან/ნაშრომთან ერთად.

3.13 სადოქტორო დისერტაციაში/ სამაგისტრო ნაშრომში/სდასუ-ში შესრულებულ სამეცნიერო-კვლევით პროექტში/ნაშრომში არ შეიძლება პლაგიატად ჩაითვალოს დაწესებულებების, სახელმწიფო ხელისუფლებისა და ადგილობრივი თვითმმართველობის ორგანოების, ნორმატიული სამართლებრივი აქტების დასახელებები, კანონიდან ამონარიდი; გამოყენებული ლიტერატურის ჩამონათვალი; მყარი სიტყვათშეთანხმებები, დარგობრივი ტერმინები, ტექსტის კორექტული ციტირება, დოკუმენტებიდან ამონარიდი მათი გაანალიზების მიზნით, თვითციტირება და სხვ.

4. სამეცნიერო ნაშრომის შემოწმების წესი

4.1 ავტორი სადოქტორო დისერტაციის ბეჭდურ და ელექტრონულ ვერსიას განცხადების (დანართი 1) თანხლებით აბარებს უნივერსიტეტის კანცელარიას, რომელიც გადაეცემა სადისერტაციო საბჭოს სწავლულ მდივანს.

4.2 ავტორი სამაგისტრო ნაშრომის ბეჭდურ და ელექტრონულ ვერსიას განცხადების (დანართი 1) თანხლებით აბარებს შესაბამის სკოლის დეკანს.

4.3 ავტორი სდასუ-ში შესრულებული სამეცნიერო-კვლევითი პროექტის/ნაშრომის ბეჭდურ და ელექტრონულ ვერსიას განცხადების (დანართი 1) თანხლებით აბარებს სამეცნიერო კვლევებისა და უწყვეტი განათლების ცენტრს.

4.4 სწავლული მდივანი/სკოლის დეკანი/სამეცნიერო კვლევებისა და უწყვეტი განათლების ცენტრი ორგანიზებას უწევს ნაშრომის შემოწმებას დასესხებული მასალების შემცველობაზე ანტიპლაგიატის სისტემის გამოყენებით და ავტორს გადასცემს შემოწმების ოქმს.

4.5 დადგენილ მოთხოვნებთან სადოქტორო დისერტაციების/სამაგისტრო ნაშრომების/სდასუ-ში შესრულებული სამეცნიერო-კვლევითი პროექტების/ნაშრომების შეუსაბამობის შემთხვევაში, ავტორი ვალდებულია გადაამუშავოს სადოქტორო დისერტაცია/ სამაგისტრო ნაშრომი/სდასუ-ში შესრულებული სამეცნიერო-კვლევითი პროექტი/ნაშრომი წერილობითი შენიშვნებისა და შემოწმების ოქმის შესაბამისად.

4.6 თუ გადაამუშავებული სადოქტორო დისერტაცია/სამაგისტრო ნაშრომი/სდასუ-ში შესრულებული სამეცნიერო-კვლევითი პროექტი/ნაშრომი ხელმოწერა არ დააკმაყოფილებს დადგენილ მოთხოვნებს, გატარდება შესაბამის დებულებებში განსაზღვრული ზომები.

განცხადება

მე, _____

(გვარი, სახელი) (თანამდებობა)

ვაცხადებ, რომ ჩემი _____ თემაზე

(ნაშრომის სახეობა)

რომელიც წარდგენილია დაცვისათვის/საჯარო პუბლიკაციისთვის, არ შეიცავს პლაგიატის ელემენტებს და ორიგინალურია. სხვა ავტორთა მოსაზრებები, დებულებები მითითებულია დადგენილი წესით, კვლევის მეთოდების გამოყენებისას დაცულია ეთიკის ნორმები. ყველა გამოყენებული ნაბეჭდი და ელექტრონული წყარო მითითებულია დადგენილი წესით.

ვადასტურებ, რომ გაცნობილი ვარ საქართველოს დავით აღმაშენებლის სახელობის უნივერსიტეტის დებულებას სამეცნიერო ნაშრომში პლაგიატის გამოვლენის შესახებ და ინფორმირებული ვარ შესაძლო მისი აღმოჩენის შემთხვევაში სანქციების შესახებ.

ხელმოწერა

(გვარი, სახელი).

თარიღი

